


220255

HI 220257P

Mag. St. Dr.

kat. komp.



JOSEPHUS COMES
G A R A M P I

DEI & Apostolicæ Sedis gratia Archiepi-
scopus Berytensis, Sanctissimi Domini no-
stri Domini PII Divina Providentia
PAPÆ VI. Prælatus domesticus & solio
pontificio Assistens, ejusdemque & San-
ctæ Sedis Apostolicæ in Regno Poloniae &
Magno Ducatu Lithuaniae cum faculta-
tibus Legati de Latere

N U N T I U S.

Universis & singulis præsentis literas inspecturis &c.



220256
ALiàs, cum in Comitibus Reipublicæ Polonæ an.
1767, & 1768. extra ordinem celebratis,
plura ex temporum infelicitate decerneren-
tur ac publicarentur, per quæ salus animarum, inte-
gritas Catholicæ Fidei, dignitas Religionis in regno
Poloniæ DEI benignitate dominantis, Immunitas & ju-
risdictio ecclesiastica, vel periclitari, vel impeti, lædi
& infringi contigerat; sanctæ memoriæ CLEMENS XIII.
P.M. ex Apostolici sui ministerii officio, nec non illustrium
prædecessorum suorum in tuendis vindicandisque Reli-
gionis & Ecclesiæ juribus exempla secutus, Illustrissi-
mo & Reverendissimo Domino Angelo Mariæ DURINI
Archiepiscopo Ancyrano demandavit, ut contra omnia
gesta, acta, ac decreta prædicta, quatenus Religioni, di-

vino



vino cultui , atque Ecclesiæ juribus adversarentur , reclamaret , sicut revera die 30. januarii an. 1768. solemniter reclamavit : prout ex ejus Patentibus literis , tunc in vulgus prolatis , & supremo Regni Cancellario , aliisque , quorum intererat , insinuat , nec non in Acta Cancellariæ Nuntiaturæ Apostolicæ relatis , constat & apparet.

Spes quidem affulserat fore , ut in novis Comitibus , quæ ab anno 1773. fuerunt usque adhuc extracta , hujusmodi damna & injuriæ resarcirentur. Sanctæ memoriæ CLEMENS XIV. P. M. haud pridem defunctus , qua literis Apostolicis , qua officiis & sollicitudinibus , vel per se ipsum , vel per me infrascriptum , nullo unquam tempore destitit Serenissimum Regem , Illustrissimos & Reverendissimos Episcopos , ceterosque hujus nationis ordines hortari , rogare , & in Domino obsecrare , ut debitus Catholicæ avitæ Religionis , Ecclesiæque juribus , quæ prudentissimis legibus fuerant à Majoribus sapienter & religiose communita , honor & vigor redderetur. Propensa in hoc voluntas & studium Illustris Delegationis tum præcipue apparuit , cum nonnullos spectatæ religionis viros , nec minus nobilitate quam Dignitatibus præstantes , designârat , qui una mecum ceterisque Episcopis Varisaviæ degentibus mutuo hisce de rebus conferrent , & quæ agenda essent , deliberarent.

Conjunctis studiis ea omnia attigimus , pertractavimus & inculcavimus , quorum remedium & præsens & necessarium esse videbatur. Sed cum in cassum cederent studia nostra , & leges ex adverso non peterentur , sed imponerentur ac peremptorie præscriberentur ; necesse mihi fuit congressus , qui domi meæ habebantur , interrumpere , ac me iis prorsus abstinere , ne , quidquid deinde in Delegatione , invitis licet animis , decerni contingeret , id me annuente (quod DEUS avertat) agi videretur. Hæc pluries oretenus declaraveram Illustribus Viris , qui me conveniebant ; hæc eadem universæ Delegationi significanda curavi per literas meas die 27. februarii

bruarii datas, & ad Illustrissimum & Reverendissimum
Præsidentem missas, quas hic pro insertis & expressis ha-
beri volo.

Sed DEO propter peccata nostra sic permittente,
factum est, ut quæ vulnera in infauſtis Comitibus anni
1768. fuerant Catholicæ Religionis usque adhuc in Po-
lonia dominanti, atque Ecclesiæ immunitati & jurisdi-
ctioni graviter inflicta, eadem non modo nullis congruis
remediis sanarentur; sed imo, paucis demptis, quorum
plagæ obteſtæ potius dici possunt, quam sanatæ, reli-
qua omnia novis ictibus, confirmatione nempe præce-
dentium assertarum Constitutionum in iisdem Comitibus
editarum, magis magisque recrudescent.

Hæc autem omnia cum vulgo circumferri & afferri
non sine ingenti animi mœrore audiam, licet palam &
coram universis, iisque præsertim, quibus in hujusmodi
deliberationibus locus est, eadem omnino reprobaverim,
sient & nunc reprobō: quinimo ea omnia pericula, inju-
rias, damna & mala omnia, quæ ex hujusmodi asser-
tis Tractatu & Constitutionibus in Religionem & Ec-
clesiam derivarent, quemadmodum aliàs semper exposui,
ita & nunc exponere pro DEI gloria & Ecclesiæ inde-
mnitate non præmitto; tamen ne, si eadem, quæ ad
statuendum impulerunt, ad confirmandum etiam adige-
rent, mora & præsentia mea in hac civitate in ullum
consensus vel patientiæ meæ argumentum trahantur: Ego
infraſcriptus, ne ullas apostolici ministerii mihi com-
missi partes & officia omittam, imo inhærendo speciali
mandato per literas apostolicas in forma Brevis ad me
datas die 16. martii anni 1773, & Actis Cancellariæ Nun-
tiaturæ Apostolicæ insertas, mihi injuncto, contra omnia
huc usque acta ejusmodi, & in posterum gerenda, qua-
tenus nempe Religionis Catholicæ, divino cultui, anima-
rum saluti, sedis Apostolicæ & inferiorum Ecclesiarum
auctoritati, seu libertati ac jurisdictioni ecclesiasticæ,
atque Catholicorum juribus adversantur, protestor, &
dissensum ac reprobationem meam solemniter declaro.

Imo

Imo Protestationem Illustrissimi & Reverendissimi Domini Angeli Mariæ DURINI Archiepiscopi Ancyranæ, prædecessoris mei, supramemoratam, confirmandam & renovandam censeo, sicut & præsentibus, velut si de verbo ad verbum infereretur, confirmo & renovo, eique in totum adhæreo: quatenus nempe, vel ea, quæ provide ab ipso reprobata & cassata fuere, non fuerint congrue, & ad præscriptum sacrorum Canonum & Constitutionum Apostolicarum correctæ & emendatæ, vel alia quæcunque de novo in præjudicium jurium ecclesiasticorum decreta in Delegatione fuissent, & in præsentibus Comitibus confirmarentur. In quorum fidem ac perpetuam præsentium ac futurorum memoriam, testimonium hoc patens, & publicum, per præsentem literas manu mea subscriptas, ac majori meo sigillo munitas, edi jussi.

Datum Varsaviæ ex Cancellaria Nuntiaturæ Apostolicæ die XVI. mensis martii anno Domini MDCCLXXV. indictione VIII. pontificatus sanctissimi in Christo Patris & Domini nostri Domini PII PP. VI. Anno I.

Josephus Archiepiscopus Berytensis
Nuntius Apostolicus.

Loco ✠ Sigilli.

Biblioteka Jagiellońska



stdr0023501

